

續修陝西省通志稿

第四十八冊

卷八十六至八十七

續修陝西通志稿卷八十六

人物十三

孝義一

李大治孝義廳人原籍湖北宜城乾隆中遷廳西性剛好勇抑強扶弱人稱爲李公道嘉慶初土匪李克全等嘯聚擄掠遠近受害賊衆憑險固守官兵團攻不克統兵者聞大治名令率衆攻之破其寨擒克全賞五品頂戴留營効用因父病假歸昕夕侍奉數年不倦父歿廬墓三年有司旌其門舉鄉飲耆賓

余國才孝義廳人乾隆中由湖北黃岡遷廳北務農爲業勤儉起家嘉慶初教匪擾亂國才出家財練鄉勇保守一方賊近則防堵遠則耕種又捐修洞寨俾難民棲止當事獎以軍功固辭不受曰無作官之志亦無其才後賊潰散官兵搜捕餘黨日誅數十人國

才察其脅從無辜者懇求大帥釋之並請給路票歸家多至八百餘人廳舊無學校十九年國才首倡客籍學校捐貲最鉅年八十有二卒子躍先武生篤於義行收租置斗小於市斗一升半家傳不改道光八年捐建社倉春借秋收貧民賴之

方怡哲孝義廳人性至孝沈靜寡言教匪之亂怡哲侍繼母病親視湯藥不避刀兵賊亦感歎不忍殺害母病尋愈

余克明孝義廳人事母至孝侍奉不倦母歿構廬守墓三年鄉里稱之

陳厚普孝義廳人侍祖母病割股肉和湯以進病稍減後復作又割股烹進之遂大愈

陳延湘孝義廳人孀母患牙痛困苦非常瀕死者屢延湘割股肉和雞子湯以進後竟全愈

汪有明孝義廳人父病篤至數月家貧無力購藥有明齋戒沐浴對月虔禱割股肉調羹以進父食之病旋瘳後十餘年始卒

樊滿清孝義廳人孝事嗣父父病篤滿清潛禱神明割股肉烹湯以進病即愈

謝國久孝義廳人豪俠好義道光間有山西客商過其門遺銀百兩國久拾得即出帖告白遲至半年失銀者至如數奉還分釐未動客分半贈之亦不受乃酬以匾額

王吉第孝義廳人性剛直篤孝友其祖昆弟分爨多年泊吉第成立慕張公藝之爲人力謀團聚糾合宗親三十餘口同居而合炊焉後孫曾繁衍老幼至六十餘人光緒十五年廳丞文德升旗以

五世同堂匾額

並廳志

劉世甫寧陝廳人幼失怙事母竭力承歡母足生疽以口吮血立

愈年四十餘以未事父爲恨遇忌日必詣墓作孺子泣又捐金修

灃峪鐵鎖橋爲母延壽

文集獻錄微

胡啟奎字光斗寧陝廳人居家孝友伯仲之間怡怡如也凡宗族

親戚因貧不能婚娶者啟奎出貲代爲成室並爲謀生計多至六

十四人不受券亦不責償

廳志

鄭之壽寧陝廳人事蹟失傳光緒某年入孝子祠

冊採訪

王計長安人有孝行乾隆三年旌同邑馬伯知廬墓三年十九年

旌武舉查繼儒以孝行著三十八年旌二子楷模俱武舉亦以孝

稱又咸陽王珂魏成佩涇陽門不吉渭南宋世亮醴泉生員張茂

德等五人並以孝行於乾隆年間先後旌表

西安府志

高衆仰字仲瞻長安人少孤事母孝乾隆丙辰舉於鄉以母老不
赴會試母歿廬墓三年後任邠州學正二年告歸教授生徒門下

多知名士

李懋長安人少孤母張病篤醫治無效懋割左臂投肉藥中母服之而愈同邑王順母病割股和藥以進病亦瘥

王宗周長安人母秦患痰疾百方不效宗周割股肉和藥以進母病卽痊後宗周子世榮因宗周病亦割股肉入藥而病尋愈人稱先後濟美云

張洲長安人七世同居乾隆四十八年巡撫畢沅奏稱洲一門孝友奕世雍和會食百人萃慈和於一氣同居七世守禮讓以成風得旨旌表祀忠義孝悌祠又同邑張濟亦七世同居家屬一百三十餘口人無間言

劉勉長安人十一世同居自其始祖世緣至勉幾二百年勤儉務農男婦百口從無違言或問勉何以致此曰衣食先人而後己工

續陝西通志卷八十一
三
作則先己而後人自無爭矣

周德極長安人七世同居閭家百口皆有恩禮德極爲人謹愿精醫愈人疾不受酬

劉元勳長安人七世同居孝友無間乾隆辛卯歲荒元勳散糧全活甚衆嘉慶元年教匪之亂又出貲修堡寨村人得免於難卒之日遠近傷悼

向紀常長安人事母至孝母歿廬墓三年朝夕不離里中化其俗同邑袁爾位性孝友母歿弟又亡一慟而絕

王學泗長安人七世同居家無爭競同邑王芳五世同居芳善醫爲人愈疾不受謝世高其行又張佩蘭八世同居孝友無間性好施鄉黨德之

李之恪字執菴長安人監生乾隆癸丑歲飢周卹鄰里並輸米數

百石助賑邑人德之孫應震舉於鄉人以爲爲善之報同邑柏自滿自樹自爲兄弟三人世業農好義舉乾隆戊辰至乙酉四值歲飢出積年粟全活一里沒後鄉人思之不衰子孫世濟其美

晁陞字景山長安人候選員外郎慷慨好義乾隆壬子癸丑歲大稜捐米數百石助賑奉旨給匾旌其門省城南北關路坎坷難行陞獨力捐修鋪石數百丈以便往來又捐修學宮書院並董其事每歲施棉衣棺木率以爲常人多德之

並縣志

袁士元號卓園長安人游學新疆入昌吉縣學性孝友治家嚴肅嘉慶某年歲大稜捐糧數百石道光十五年又飢捐錢三百餘千以賑邑令表其門尤善排解鄉里有爭鬥者得一言靡不折服數十年無以訟聞者孫錢字寶初花門之亂與同邑柏景偉倡辦團練後隨提督曹克忠剿賊甘肅以功保訓導賞藍翎加六品銜同

治十一年選朝邑訓導中光緒丙子科舉人大吏稔其才委修本籍蒼龍靈沼二河籌畫周詳董勸得法閱五月而功成沿河村堡稱頌不衰著有知非齋墨譜求正草蒼靈瑣言日記雜著若干卷張士魁長安人急公好義道光間創修澧水靈沼兩河隄沿河民田不受水冲得以安業數十年者士魁之力也

俞樹璧長安人六品軍功從九品銜咸豐三年間因母潘氏病篤潛割股肉入藥飲之病遂愈縣令旌其門光緒二十六年閏八月樹璧患病沈重醫皆束手女翠英年甫十六侍奉湯藥寢食俱廢乃焚香告天乞以身代九月初十日在暗室潛割左臂肉和藥以進父病亦愈同時奉旨旌表

羅堂字紀亭長安人原籍山西洪洞避亂居長安遂家焉家赤貧性至孝力謀甘旨以奉親同治初口匪竄陝回逆乘間起所至騷

然堂奉親入山或避省城往返數年皆伺賊隙一日賊劫其父於途堂在後心暴動飛走及之牽賊裾泣求以身代賊欲兵之堂引頸曰寧殺我乞貸吾父賊怒恐以刀環堂持之益力賊歎曰孝子也乃釋之後十餘年家稍振而勤儉如初絲粟不妄費然遇貧無衣食及不能婚喪者必飲助之光緒丁丑庚子兩值歲荒又出粟助賑全活甚衆議叙從九品銜

劉映藜字子青長安人以歲貢候選訓導中式光緒甲午舉人授徒終身藉奉甘旨有弟病瘵映藜甚愛之弟與映藜析產三次而三蕩其產映藜復與同爨者三弟所居亦屢典出而映藜三爲贖回終無怨言弟歿其子復不事生產貧窶日甚映藜又以弟之妻子同居而厚遇之

郭維城字周臣長安人事親至孝閉門讀書足不履城市光緒丁

丑歲大饑捐粟百餘石助賑遇族中貧乏者隨時周卹全活多人
後服賈王曲鎮比鄰失火勢將及己維城焚香跪祝天忽反風火
竟北徙衆以爲陰德所感又劉姓借維城錢數百千日久不能償
維城慷慨焚券不令人知劉贈以聯曰粟助漢家今卜式券焚薛
市古田文蓋紀實也

並採
訪冊

豐昇額西安駐防旗人順治初逆闖初殄大難甫平戰骨蔽郊野
豐昇額日以掩埋爲事數年之久無復暴露者每入山遇齧骼俱
瘞之年九十餘終子四皆貴顯後京旗桂良奇成額官至督撫皆
其裔孫也

張銘新字子善長安人性醇樸尤精外科施藥施診全活甚衆於
振荒積穀諸義舉竭力經營至稱貸爲之同治初花門構亂銘新
練團保衛一鄉遇敵未嘗敗北偶值農忙團丁解散賊突至銘新

急升屋賊自下以長槩刺之銘新揮刀斷槩乘勢斬賊首賊駭退自是無敢犯其村者

馬智仁長安人鄉飲耆賓樂善好施同治初叛回焚族人智福室智福妻辛氏冒險入火挾智福出得不死智福旋病歿辛氏矢志守節貧無以養智仁重其義養之終身辛氏死智仁代爲棺殮買地葬之迨二年秋弟智和死於回亂將葬賊復至親族皆避匿智仁不忍去賊感而捨之年八十有三卒

席蘊德字維繡咸寧人庠生性至孝侍父疾衣不解帶者數月割股以進獲愈事母備極色養流寇陷城父母柩在堂賊疑爲藏鏹欲發之蘊德僵臥柩上不避鋒刃屢嚇之不動旣而曰眞孝子也捨之而去季子斌亦庠生事親晨昏不踰父病侍奉湯藥寢處其側衣不解帶者數載歿後席薪枕塊三年不茹葷酒日夜悲號致

疾不起至死猶呼父母不絕有司旌其門

縣志及陝西輯要

徐鴻烈咸甯人親疾投藥罔效鴻烈割臂肉和藥以進病果痊鄉

里傳聞邑令榜其庭並樹碑以志之

文集獻徵錄

傅正志號南塘咸甯人太學生生平尚義輕財戚族無力婚葬者隨時貲助不能餬口者給以錢粟數十年不倦又出貲重修忠孝節義二祠及書院齋房種種義舉所費不下數千金而無德色人尤以爲難

葉逢春字資實咸甯人附貢生居家以孝友聞堂弟某幼失怙撫育成立族人某家徒壁立代爲贖田並給恒產又有年老無子者逢春生養死葬始終如一周恤鄉鄰每歲冬給糧至百石乾隆間屢遭大祲捐粟數百石助賑時疫大作施藥施棺並立義塾以教貧寒子弟工醫術尤精針灸患者踵至雖嚴寒盛暑不辭勞鄉人

皆稱之曰佛卒年七十有八聞者莫不流涕又同邑李威鳳何宏圖及傅彤皆於乾隆七年十一年以孝行先後旌表

馬化鵬字雲菴咸寧人回籍家素封時以周急爲懷每歲出數百金以救窮困凡鄉閭戚友告貸者必慷慨施予而不受其券大吏屢欲奏聞化鵬堅辭兄化麒亦好義俱爲回部之望

陳錫字永菴咸寧人布政司理問職銜敦品好善省城東關道路不平捐銀數千以石鋪砌負郭南文昌閣傾圯捐貲重修米商被盜號哭欲死錫助以貲遣歸里值歲歉施散錢粟全活甚衆後嗣衣冠不替人以爲積德之報

劉兆熊咸寧人十世同居又王經鰲八世同居石楷七世同居趙孔嘉六世同居

並縣志

楊遷榮咸寧人爲安康令吳靖安僕咸豐十一年正月口匪僞增

王率衆攻安康城榮遷隨令堅守十一日城陷靖安死之遷榮急入署護靖安眷屬將他徙而悍匪何得勝追至靖安母妻子女俱被殺司閹僕鄭忠赴火死遷榮曰君以死殉主誠可敬吾將有待不能遽死也僞增王旋移營去遷榮忽遇何得勝於城濠畔奮力擒之鳴於官得勝伏法遂呈明靖安全家死事狀贈卹如例祀昭忠祠咸寧令焦雲龍以忠義堪嘉表遷榮之閭焉

劉志剛字養亭咸寧人少孤繼母虐待之志剛孝敬有加見稱鄉里同治二年回匪肆亂城南蹂躪幾徧志剛素負豪氣乃糾合附近八村健者擊賊於神禾原賊頗挫衄旣而賊益多衆不支死亡枕藉志剛被創十餘蹶仆於地猶連呼殺賊而絕賊去家人往視之尙有餘氣舁歸調養竟痊此雖幸而不死然不能不以捐生取義許之

盧祖齡字壽菴咸寧人父修德由舉人官廣東知縣祖齡故豐於
貲而性好施與光緒元年秋歉收近村多餓者祖齡於杜曲街爲
粥以食之用粟至百餘石次年春始止丁丑大侵旣捐穀以助官
賑又於附近八村分極貧次貧數千人賑以粟凡九閱月杜曲南
申店橋年久欹側祖齡倡捐鉅款重修之西門外通濟渠畔車路
爲盤鄠入省通衢傾危多年行人病之祖齡捐貲獨修卒爲坦途
傅士美字玉如咸寧人經商致富樂善好施如城南申店橋縣署
外通化樓長安學魁星樓皆捐鉅款以佐其成光緒丁丑大飢官
紳議籌賑士美倡捐粟六百石大吏奏聞予三品封典子有常諸
生候選知府見義勇爲庚子旱災亦捐鉅款以爲衆倡可謂能繼
志矣

梁世瑞字兆初咸寧人年四十始讀書通大義每以風俗不古世

情澆薄爲憂出貲刊聖諭廣訓宣講拾遺先正格言往來遠近村莊宣傳講解因而改過遷善者未可以更僕數至周貧乏施茶粥捨棺木置義塋皆竭力爲之世瑞家故不中貲值光緒辛丑歲飢自出粟二十餘石以食餓者而家中則日食糜粥也鄉里稱頌不

置

並探訪冊

鄭先義咸寧人性至孝家極貧而於父母甘旨服用無少缺母死先義哀毀欲絕比父歿結廬守墓朝夕痛哭未逾百日氣竭聲嘶而死此雖不知節哀順變仰體親心然在世俗澆薄時亦可憫而可敬矣

關登科咸寧人同治初回匪劫其兄子將殺之登科携己子往曰兄亡祇此一子命我撫之若見殺我何以對兄於地下願以我子代之賊感其義並釋歸